

られたる者なりき、これら必參考の一とはなりし者なるべし、其建元論は、早く寛政三年辛亥年一正翁十八八になれる者にて、其文左の如し、

建元惡乎始、始於漢武、然則非古聖人之制歟、曰其法固始乎漢武、而其義則未嘗不本於先王之意也、古者天子有四海、諸侯有一國、王公即位、各紀元年、慎其始也、每歲天子頒朔、諸侯奉而行之、謂之王正月、大一統也、雖然各國紀元、彼此不一、則是曷若夫年號之建、通于天下、而一統爲最大也哉、秦廢封建、海內混一、而漢猶有諸侯王、當時紀年、上書天子大一統之年、而下書諸侯王自有國之年、譬如魯孝王刻石曰五鳳二年、魯三十四年是已、何必王正月云乎哉、故年號之行、通於天下、雖僭位假號者、無復容其僞矣、此非漢武之智能過聖人、而先王之制不及後世也、凡天下之事、必粗於始而精於終、略於先而詳於後、其勢然也、宋儒胡氏以爲、元原於一、而後世紛々、別建年號、失其義矣、而朱氏譏其說高而不曉事情、廼曰、如今中興以來、七箇元年、若無年號、則契券能無欺弊者乎、可謂當矣、然則年號既建矣、元亦可屢改乎、曰不然、元之爲言首也、人君即位、既已紀元、豈可復改乎、而其復改者、戰國之末造也、餘習所存、延及漢氏、文景中元、後元、再三改元、至武帝建年號、則其改亦屢矣、雖不能無失慎始之意、而亦能得一統之義、夫復何咎、後世安庸之主、踵而行之、一世數元、可謂濫也已、雖然唐宋之君、傳世二十、歷年三百而止、則一帝數號、猶尙可紀也、夫皇朝自孝德帝肇建大化之號、至今六十有餘世、一千有餘歲、其間或以祥瑞名年、因災異改號者、殆過二百、皇統之隆、傳之無窮、而與天地終始、則自今以往、一帝數號、其可勝紀邪、革之象曰、先王以治曆明時、而讖緯家因有革命革命之文、自延喜中博士清行首唱此說、辛酉甲子必爲改元、蓋治曆緯誕妄、又何足言哉、且夫祥瑞不足恃也、災異固可畏也、能知其不足恃、則何必名年能知其可畏、則修德以勝之而已、亦何必改元、明氏之建國也、累世相承、於即位之踰年、改元終身不易、其於一